



Selasa, 16 Maret 2021

Ogen: Lukas 15:11-20a



Nggit Ngakui Salah



Erbahan salah biasa, sabab labo kita manusia sisempurna, la sitik kekurangan si lit ibas dirinta. Ulih perbahanenta si la payo e banci mpeturah perubaten ras la siangkan. Janah hubungenta ras kalak sideban enggo ceda, janah situhuna banci denga ipekena adi nggit kita siale-m-alemen salah. Pernah jadi, dua kalak pernanden si nai erteman tapi erkiteken sada hal enggo ceda pertemanenna. Nuate iperdameken, ula lebe ngakui salahna, ncubaken menaken ercakup pe mela ia. Nggit aku erdame tapi ia lebe ncakapi aku ya, lit terbegi belas-belas sibage rupana. Payo, mesera kal ngakui kesalahen, amin mbelin kal ulihna dikune kita nggit ngakuisa. La saja pusuhta si salang sai tapi hubungenta ras kalak sideban pe pasti reh ulina. Ngakui kesalahen perlu kal usaha ras perjuangan. Ibas erbage perenungen, pertimbangan seh kubas sada keputusan, salah kepe aku.

Enda me siinanami ras siibentasi anak singuda ibas renungenta paksa enda. Sada pengalamen simeherga kal siinanamina. Semangat si luar biasa, ngenanami masa nguda si atena inanamina, erbahan ia mindo erta sijadi baginna selaku anak. Ibas pergaulenna la ia beluh dengen ndabuh kubas pergaulen si la mehuli sierbahanca keru ertana, geluhna terkatung-katung, pagina man pe lanai bagi arusna. Situasi enda mabai ia kubas perenungen kerna rumah bapana, seh kubas keputusan mulih, ngaku salah dengen tek kal ia maka la ia itulak, ialo-alo bapana me ia. Kata kuncina eme nggit ngaku salah pasti terbuka dalam man banta, ibas kai pe, singakui kelepakenna ialemi me ia. Banci saja turi-turin enda enggo kal biasa sibegi, situriken tapi enggo nge nggeluh ibas dirinta? Sirenungken, lit nge kelepakenta, kesalahenta man kalak sideban dengen sieteh labo kita payo? Nggit nge kita ngaku salahta? Akukenlah!



Banggalah adi kita pang ngakui kesalahenta